

摘藻堂四庫全書薈要

集部

欽定四庫全書蒼要卷一萬四千四百五十五

集部

宛陵集卷十五

宋 梅堯臣 撰

觀何君寶畫

燕馬易畫吳牛難圖馬骨隱細牛骨麤馬毛要密牛毛
疎麤疎必辨別細密多模糊乃知戴嵩筆能出韓幹徒
幹馬精神在韁勒嵩牛怒鬪無牽拘昨日何家觀小軸
絹雖破爛色不渝二頭相觸角競擠前脚如跪後脚舒

尾株榻直脊脅感筋力寫盡蹄腕殊一勝一敗又苦似
勝者狠逐敗者趨卷窮赤印置小字置字乃是陶尚書
尚書國初人愛畫收幾厨買時不惜金與帛帛載羊車
錢載驢後世兒孫不能保賣入窮市無須臾凡目矜新
不重故千錢酬直皆咲愚四牛遂為何氏有裝背入眼
天下無坐中吾儕趣已異又喜玄女傳兵符此本實稱
閻令畫下筆簡細容顏姝三人鬼狀一牛首八女二十
美丈夫黃帝中間蔭葩蓋霞扇錯玳旌擁朱冠服難知

歲月遠但見儀衛森清都復觀鹿臺獨夫受妲己不笑
何由娛酒池肉林騎行脅剖心斫脛堪悲吁數幅吳王
宴西子綵舟張樂當姑蘇宮娥數百簇高下鬢髻一一
紅芙蓉危峰細浪得平遠前對洞庭傍太湖商紂夫差
可垂誠歷世傳玩參盤玉鵬鷹草木不足記特詠此事
心何如

送任太博歸省西都

人言少保持家謹載見西京萬石君子舍今歸浣裙切

里門重戒下車勤田園一一能為計僮僕訢訢亦有聞
我負洛陽山水久試因行色寄嵩雲

送少卿張學士知洪州

朱旗畫舸一百尺五月長江水拍天穩去先應望廬岳
暫來誰復見龍泉閣經吏部重為記山識吳王舊鑄錢
往迹可尋軍士少賸書遺逸附青編

觀楊之美畫

天官乘車建朱旗赤幡前亞風卷披二龍緩駕蒼髯垂

印箱傍挈文籍隨雙驂推輓如畏遲行從冠服多威儀
水官自有真龍騎兩佐並跨鯨尾螭步趨羣吏怪眼眉
雲生海面無端涯雷部處上相與期人身獸爪負鼓馳
後有同類挾且搥次執電鏡風囊吹青虵有角魚足鬚
上下引導神所施地官既失不可知此畫傳是閻令為
設色鮮潤筆法奇絹理膩滑雞子皮吳生龍王多裂隳
八軸展玩忘晨炊李成山水曉景移黃荃花竹雀擁枝
韓幹馬本摸搭時神駿都失存毫釐日高腹枵眼皆眊

邂逅獲見何言疲厚謝主翁意不衰他日飽目看無遺
李審言遺酒

大梁美酒斗千錢欲飲常被饑窘煎經時一滴不入口
漱齒費盡華池泉昨日靈昌兵吏至跪壺曾不候報箋
赤泥圻封傾瓦盎母妻共嘗婢流涎隣家葡萄未結子
引蔓垂過高牆巔當街賣杏已黃熟獨堆百顆充盤筵
老年牙疎不喜肉况乃下箸無腥膻空腸易醉忽酩酊
倒頭夢到上帝前賜臣蒼龍跨入月不意正值姮娥眠

無人采顧傍玉兔便取作腊下九天拔毛為筆筆如椽
狂吟一掃一百篇其間長句寄東郡東郡太守終始賢
切莫汲竭滑公井留釀此醕時我傳

送邵郎中知潭州

張鏡疊吹洞庭外緣虎帶刀蠻帥迎且諭漢家綏撫厚
莫言湘守事權輕木奴洲近霜包熟斑竹林昏野鳥鳴
賈誼宅邊寒井在暫留千騎漱餘清

送楊叔恬應北京辟

昔時見子宛丘下丞相待子知子賢子於文字實廣博
海客謾估珠盈船欲賣明月一寸魄雖豪未有售以錢
通都大邑忽辨寶直取不犯驪龍涎遂作照無物矜夸
魏人前從茲十二車光彩生從先

送洪州通判何太博若谷先歸新淦

拜官江上客乘馬不乘船獨畏蛟龍浪將歸風雨天葛
花侵野徑源水入腴田君住巴丘下西山道路連

五月七日見賣瓠者

老圃奪天時馬通為煦嫗四月彼種瓜五月此賣瓠陽
陂與糞壤功力且異趣瓜遲瓠何早豈不同雨露速利
乃在人爭先無晚暮

和江鄰幾景德寺避暑

蛭蟻不應雨鳴鳶不生風鬱氣若甑炊初陽如火紅裸
膚汗交流脂體膏將鎔龍頭費挹酌犢鼻強遮蒙常畏
俗物來去避青蓮宮廣堂鋪琉璃高簷蔭梧桐廊壁畫
地獄獄具鑊鋸舂鐵城何焰焰鐵床亦彤彤誰知炮烙

死活間傳自西域黃面翁正類人世苦此熱聲利役使
亡西東京師貴賃幾椽舍窮煎相似聒欲聾屋頭朝爨
作飲食枕底夕艾驅蚊蟲宜爾近巷江夫子賦詩特壓
塵土中

送趙諫議知徐州及

鹿車幾兩馬幾匹軫建朱幡騎殺弓雨過短亭雲斷續
鶯啼高柳路西東呂梁水注千尋險大澤龍歸萬古空
莫問前朝張僕射毬場細草綠蒙蒙

送邵戶曹隨侍之長沙

青袍會稽掾采服湘江行水館
魚方美犀舟枕自清鷗
鵠啼欲雨蟬螀見還晴風土雖卑濕醇醪可養生

晨起裴吳二直講過門云鳳閣韓舍人物故作五章以哭之

平生交友淚又哭寢門前魯叟不言命楚人空問天
月沉滄海底星隕太微邊莫怪終埋沒文章自可傳

使虜嘗專對江湖謫幾年始看還近侍遽此隔重泉沃

酒酒空滿託詞詞謾傳視予猶手足莫怪獨潛然

算數曾無據仁人亦莫聞狼愚多至老蘭桂苦先焚不
竟千秋恨還如萬里分臨風一號慟易散日邊雲

昔時賓宴地今見總幃遮棲室那因鵬從盃不為蛇曾
無越人術竟起漢臣嗟明日東城陌悲涼後部笳

曉陌行車過交相歎且驚荀龍聞一蛻穆駿失全鳴不
復中書直空餘左史成緒言猶在耳尚想見平生

聞高平公殂謝述哀感舊以助挽歌三首

文章與功業有志不能成嘗以躋高位終然屈大名遺
風猶可見逝水更無情歸卜青烏壠韓城苦霧平

京洛同逃酒單袍跨馬歸明朝各相笑此分不為稀公
既參鑪冶予將事蕨薇悲哀無以報有涕向風揮

一出屢更郡人皆望酒壺俗情難可學奏記向來無貧
賤常甘分崇高不解諛雖然門館隔泣與衆人俱

歐陽郡太君挽歌二首

夫人有賢子往歲謫夷陵欲使無愁鬱怡然見寢興外

詞陽磊磊內畏實兢兢濟壽復終貴共為時所稱
當時丈人歿雖少守孤兒以及成名譽何嘗厭蒺藜暮
年終饗福陰隲不應欺莫使碧江上獨傳陶母碑

依韻和石昌言學士求鼠鬚筆之什鼠鬚鼠尾者
前遺君謨今以松管代贈

江南飛鼠拔長尾勁健頗勝中山毫其間又有蒼鼠鬚
入用不數南雞毛二物緩急豈常獲捕刺徒爾操蠻刀
舊藏已贈蔡夫子報君松管何蕭騷

邃隱堂

大梁車馬地塵土飛百尺賢愚走其間朝暮不見迹北
望天波門垣垣宗室宅宗室令王孫愛書輕玉帛華宇
何深沉但聞列圖籍曲房有窈窕空自事眉額體胖生
粹和安石處巖石古來為善樂豈以歌鍾適

讀永叔所撰薛雲衛碣

文章如塗金光彩發美器所宜玉石間模寫傳千祀堅
堅孝子心森森栢庭閔豈與石麒麟原傍鬬蒼翠

和石昌言以蜀賤南賤答松管之什

蠻賤抽轉龍鱗細秋兔束毫雞距尖揚子校經聊以贈
蜀麻江楮報何嫌

赤蟻辭送楊叔武廣南招安

南方赤蟻大若象潛荒穴洞人莫逢天公合雨不決雨
從橫亂出將自封侵壇凌壤壞城市戰鬪億倍南柯雄
嘗聞穿山食此物此物既大非常凶張舌流涎莫可餌
枉啄不怕長戈春今令智者以智取即見蚍蜉傳太宮

因而使知禍福理天子下令雲從龍

走筆戲邵興宗

子魚一尾不曾有又諾毘陵蒼鼠毫細粒吳粳誰下咽
尖頭越管底能操

送李中舍襲之宰南鄭

莫問襄中道路難襄陽直上幾重灘蒼烟古栢漢高廟
落日荒茅韓信壇出水槎頭一絲挂穿虹雨脚兩橋殘
土風大抵如南國期會先時俗自安

送王察推績之鄧州

昔向南陽憶洛陽
秋橙初熟半林黃
車過白水沙痕潤
雁落鉗盧稻穗長
廢壘漢碑金刻字
古原秦冢石為羊
太平羽檄何曾有
賓主相歡菊薦觴

戲酬高員外鯽魚

天池鯽魚長一尺
鱗光鬣動楊枝磔
西城隱吏江東客
晝日馳來奪炎赫
冷氣射屋汗收額
便教斫膾傾大白
我所共樂仲與伯
羨君赴約笑啞啞
持扇已見飛鸞駟

欲往從之雲霧隔

送何濟川學士知漢州

丞相初得君有志重儒術乃言天下士徒此占清秩遂
懲銜鬻人忝冒十八七進君天祿閣此衆為第一又薦
王張韓恬可與君匹吾儕宜慙羞空自預朝鞞欲歸無
田園強住枉歲日值君乘高軒西望函谷出當時迎長
卿書史傳未悉車馳及襁負千萬今可詰老農喜君來
田租不妄率織婦喜君來縑機當俟畢府胥喜君來督

責去暴扶疾苦無不求前人唯法律畫錦榮既浮康民
美方溢真為丈夫志豈是名過實

依韻和達觀師聞蟬

飲餘晨露吸餘風噪遍高枝為俗聾欲比伯夷清已甚
不餐周粟腹常空

依韻和杜相公謝蔡君謨寄茶

天子歲嘗龍焙茶茶官催摘雨前芽團香已入中都府
闢品爭傳太傅家小石冷泉留早味紫泥新品泛春華

吳中內史才多少從此莼羹不足誇

依韻和接花

唯是圃人巧非關元化偏折條違物理遷艷得花權美女嫁寒壻醜株生極妍世間多妄合吾不謂之然

送石昌言學士

混混拍堤瓜蔓水軒軒銜尾挂檣船使君東下只朝夕父老走迎無後先古堞秋耕拾銅鏃長淮瀑雨入壕蓮鳴猿舞鶴仍持去不憶承明夜直眠

書南事

大梁國南門驛騎方騰趨波波一何急蠻寇圍番禺
禺本無備前賴魏大夫大夫築子城今得守以須兵雖
不滿萬閉壁堪指呼老幼轉木石壯健操矛弧廩庫得
以完日月不易圖城中舊無井魏鑿安輓轡魏由飛語
去不使立外郭古稱時有待淺薄皆謂紆曲突與爛額
看取報功殊

送吳照鄰都官還江南

霜前江水磨碧銅岸背菱葉翹赤蟲吳郎髮絲蒼幾縷
不羞月上扶桑東羞見清波照人影去時黑髮吹春風
五年歸來婦應喜從此不問西飛鴻

馮子都詩

并序

漢霍光愛幸監奴馮子都與梁冀嬖奴秦宮事相對唐
李賀作秦宮長辭亦云子都當時已有詩予因補之

黃金畫車屋韋絮綠車輪牽以五采絲藉以刺繡茵出
入長信宮晝夜將誰親所親美且少玉頰丹砂脣殷羅

縫輕襦明珠攢緇巾半醉卧車中侍婢躡行塵憶昔廣
明亭將軍愛憐頻便房不使殉易寵在茲辰嗣侯喜驅
逐平樂多從賓青絲穿五銖累室貯百珍歡與子都異
矯與子都均用財糞土擲吐氣日月跋天地可齊久禍
患豈有因秋風茂陵下蒼蘚上騏驎

七月十六日赴庾直有懷

白日落我前明月隨我後流光如有情徘徊上高柳高
柳對寢亭風影亂疎牖我馬卧其傍我僕倦攣肘寂寂

重門扃獨念家中婦乳下兩小兒夜夜啼向母問爺若
箇邊天性已見厚不嗟霸枕孤不愧棲禽偶內有子相
憶外有月相守何似長征人沙塵聽刁斗

采芡

蝟毛蒼蒼磔不死銅盤蠹蠹釘頭生吳雞鬪敗絳幘碎
海蚌吐出真珠明磨沙漉水葶殼滑斫桂煮釜風波聲
齒如編貝嚼明月曼倩不復饑腸鳴莫論一斛貴與賤
堂上狼籍無由行

史氏南軒

庭中碧玉盞上結三重山飛光入酒盃舞翠生髻鬟竹
林眠黃蘗莎徑欠白鷗主人無倦情窻戶不須關

送河北轉運使陳脩撰學士

河湟多宿兵兵食固所須幸時不戰鬪畜養安可無古
興十萬師七十萬家輟耕鋤今來歲調餉且與往昔殊
不使民轉輓但使民歸租急緩實塞下商賈以利趨關
西河東亦如此軍食雖足民實虛公乎抱長才當有所

畫謨應不貸內府重錦象牙明月珠邊城預自足寧待
臨帟輸莫令稱庭臣為言桑大夫

奉和寄宣州廣教文鑒師

秋池對門蓮子枯野壁剝月蝸涎塗庭中兩株古楠樹
上有山鳥長相呼當時聯巢接飛者一落梁宋一海隅
扶桑日枝幾千尺光彩不獨生陽烏

送陸介夫學士通判泰州

從來戎馬地饗士日椎牛介胄奉儒服詩書叅將謀隴

雲連塞起渭水入關流豈似瀛洲下窮年事校讐

送徐君章祕丞知梁州軍

蒼壁東江流孤軍水上頭蛟龍驚鼓角雲霧裛衣裘
午市巴姑集危灘楚客愁使君才筆健當似白忠州

依韻和秋夜對月

陳王苑裏望空虛吳客風前憶具區橫閣漸看河影轉
繞枝還見鵲驚無蟲催織婦機成素露逼鮫人淚作珠
才比陶潛無用處紗巾時任酒沾濡

宛陵集卷十五

欽定四庫全書薈要卷一萬四千四百五十六

集部

宛陵集卷十六

宋 梅堯臣 撰

和曹光道風拔三檜

飄風西北至樹苦萬繹牽君家三古檜繁根龍地纏其
固謂不拔朱欄擁青塼今同秀林木摧倒誰復憐安得
百力士扶持尚可全慎勿伐作薪豈無庭燎然

飲劉原甫家原甫懷二古錢勸酒其一齊之大刀

長五寸半其一王莽時金錯刀長二寸半

主人勸客飲勸客無天妍欲出古時物先請射以年我
料孔子履久化武庫煙固知陶氏梭飛朱風雨天世無
軒轅鏡百怪爭後先復聞豐城劍已入平津淵聊譬二
百載儻有書畫傳嗚呼纔十一便可傾觥船探懷發二
寶太公新室錢獨行齊大刀鏃形末環連文存半辨齊
背有模法圓次觀金錯刀一刀平五千

其文精銅不蠹
如此

蝕肉好鈎婉全為君舉酒盡跨馬月娟娟

送嘉州監押曹供奉

測

舊友尹師魯嘗作送子文文存人已歿行復我何云平
時為郡尉遐方宜撫軍定過揚雄宅野鶴自成羣

答仲源太傅八日遺酒

陶潛九月九無酒望白衣何言先一日雙榼忽我歸借
問遺酒誰天宗分日暉明當酌大斗黃菊羔醅肥李賀
諸王孫作詩字欲飛聞多錦囊句將報慙才微

送張生還和州

山頭孤石望來久天外行人今獨歸藥囊自有留生術
不管淮南木葉飛

李康靖少傅夫人挽詞二首

九月秋風急三川苦霧迷卜邛新隧啓度輦短簫齊寶
劍知終合靈蟾已殞西松門來會葬車馬幾千蹄
板輿曾至鄭靈輅此歸周行哭人增慕凝笳月正秋九
原開祔穴故土覆新丘歲晏寒松下茅苦孝子留

送韓文饒寺丞宰蕭山

吳會未探穴廣陵先看潮橫江百馬怒卷海萬輦寬舟
楫凌湍發魚龍接浪跳薄言增勇氣少當舉山瓢

蔡君謨示古大弩牙

黃銅弩牙金錯花銀闌線齒如排沙上立準度可省括
箭溝三道前直窰其度四寸寸五刻鍤光歷歷無纖差
蔡侯出此問誰得往年客遺來琅瑯瑯瑯築城穿厚壤
既獲磨洗爭傳誇莫知歲月孰製作精妙近世應難加
發機高下在分刻今人妄射功仍賒願侯擬之起新法

勿使邊兵死似麻

和劉原甫省中新菊

華省切星斗沉沉嚴燕房秋風茂陵孫種菊爛生光天
晴蝴蝶飛上下舞雙黃劉郎才筆豪移榻吟在傍日晚
吏已散殘景上粉牆有酒無飲伴掇英襟裾香還思陶
淵明弃官歸柴桑東籬獨此物盈把恨無觴賴有白衣
來好事遺壺漿適意各一時豈乏同舍郎

依韻和仲源獨夜吟

秋鴻聲澀秋絃苦塗金博山煙夜吐寂歷虛堂燈暈生
誰人共聽西窗雨

寄題周敦美琨瑤洞

僊人采玉驅雄龍列山剖璞青腔空因邃為堂曲為室
石乳溜壁光玲瓏僊歸龍去草樹長蔽翳不復人蹤通
指壇買墅下峯下洗刷務欲險怪窮地鱗鹿跡尚莫到
安問樵老諸牛童古人未得今已得萬景付與由天公
何當歸來斂頭角任從寶我生白虹陰溪淺水菖蒲綠

下有蝦蟇雙眼紅及時佐酒斫兩股勿使更入明月中
許生南歸

大盤小盤堆明珠海估眩目迷精麤斗量入貢由掇拾
未必一一疵類無不貢亦自有光價此等固知魚目殊
許生懷文頗所似暫抑安用頻增吁倚門老母應日望
霜前稻熟春紅稈歸來爛炊多釀酒洗蕩幽憤傾盆盃
九卿有命不愁晚朱邑當年是嗇夫

得沙苑楹棹戲酬

蒺藜已枯天馬歸嫩蠟籠黃霜冒榦不比江南楂柚酸
橐駝載與吳人看

寄題杭州廣公法喜堂

淘青研朱畫屋梁黃漆栢障連曲房日暉月色不須照
了了自可窺毫芒夕陰花斂似欲病飛鳥不驚烏帽郎
深山窮谷謾幽僻喜得吳儂是藥囊

題滿公僧錄西明軒

赤萍纔落鄧林外青銅半磨傍露明飛光斜入了不隔

坐臥一榻琉璃平西方古胡黃金質貝葉傳寫烏行橫
謂曉此教居此軒滿壁圖書遙峯生

寄題撫州戴秀才息心亭

蒼蒼開幽林峯嶺日相對雲歸垂衣纓泉落響環珮仕
宦雖有負耳目得以貸俯仰宇宙中晏然維進退

送臨江軍監酒李太博

三江卑濕地北客宦游稀霧氣多成雨雲蒸易損衣白
醪燒甕美黃雀下田肥未辨殊方語山歌半是非

道損司門前日過訪別且云計程二月到郡三看
暗惡海棠頗見太守風味因為詩以送行

蜀州海棠勝兩川使君欲賞意已猛春露洗開千萬株
燕脂點素攢細梗朝看不足暮秉燭何暇更尋桃與杏
青泥劒棧將度時跨馬莫辭霜氣冷

送雪竇長老曇穎

朝從雪竇請暮卷雲衲輕莫問居士病自從他方行吳
霜點髭根海鳥隨衆迎安隱彼道場萬事都忘情

送襄邑知縣杜君懿太博

霜落水未落令君將度河農耕休叱耒女織罷鳴梭赤
幘驅亭長丹砂挈印窠無慙浚儀政才比陸雲多

送晉原喬主簿

太守登車時我病不能出遥期玩海棠度險馬屢叱唯
畏行邁遲惡欲及春日何為愛此花曾非桃杏匹生紅
濃復淺瘦蒂脩且密湖傍幾十樹雕盤擁新漆酒傾瑠
璃盆月上歡未畢縣官同遠宦簿領無督詰刻意詠芳

菲追補老杜失

十一月十三日病後始入倉

曾非雀與鼠何彼大倉為狐裘破不溫黃狗補其皮霜
花逐落月綴在枯槁枝予年過五十瘦寢冰生肌

閔尚衣盜袴

昔聞廉叔度能使民多袴多袴非或貪持新不忘故嗟
嗟亦主官奚自門閥汙中府中紋綾袖之呼馬去左右
即其私邀索乃就捕三公出死狗訓導能有素今同竊

鉄者見爾皆此趣

胡夫人挽歌 子哲

已哉胡夫人其壽七十餘其子哀母死一夕髭皓如髭
白髮亦白長號守茅廬扶棺埋吳雲來會傾市墟誰復
向寒月卧冰求鯉魚

裴直講得潤州通判周仲章鹹豉遺一小餅

金山寺僧作鹹豉南徐別乘馬不肥大梁貴人與年少
紅泥罌盞鳥歸飛我今老病寡肉食廣文先生分遺微

贈裴直講水梨二顆言太貽答吳甘三顆以為多
走筆呈之

綠橘似甘來太學大梨如水出咸陽
莫將多少為輕重
試擘霜包幾瓣香

送樂職方知泗州

長堤凍柳不堪折窮臘使君單騎行
蘇合輕裘霜莫犯
銅牙大弩吏先迎
山旁楚賈連檣泊
水上禹書寒磬清
試向郡樓東北望
煙波千里月臨城

和劉原甫十二月十日試墨

海神不朝雪不作大梁塵土蔽天高道傍牛喘復誰問
佛寺吹螺空唱嘯相公跪香牀且佚陛下減膳心焦勞
因君試墨偶有激勇辭壯筆揮長刀予無奈何亦思飲
飲渴罍甕從鋪糟

十二月十三日喜雪

三日朔風吹暗沙蛟龍卷起噴成花花飛萬里奪曉月
白日爛堆愁女媧大明廣庭踏朝駕雉尾不掃粘宮靴

宮中才人承聖顏捧觴稱壽呼南山三公免責百姓喜
斗酒十千誰復慳

送劉職方知汾州

齊

西河風俗厚尚翹古所聞子夏有遺廟千木有遺墳太
守下車日當先此二君不必汾水上秋風看雁羣

十三日雪後晚過天漢橋堤上行

堤上殘風雪橋邊盛酒樓據鞍衰意盡倚檻艷歌留海
月開金鑑河冰臥玉虬當年洛陽醉偏憶董糟丘

送崔黃臣殿丞之任廬山

驂駒西行四千里直度經橋百尋水石上菖蒲未見花
蒙頂茶牙初似觜采時應憶故園春故園開焙亦思人
其間杜鵑不中聽掩耳聊看錦雉馴青崖鞭垂瘦虵尾
仙人掐節隨鱗起斫取他年跨馬歸劒棧秦山多折筵
十九日出曹門見水牛拽車

只見吳牛事水田只見黃犂負車輶今牽大車同一羣
又與騾驢走長陌叩頭闊步塵蒙蒙不似綏耕泥汨汨

一一夜眠頭向南越鳥心腸誰辨白

吳太博遺柑子

太學先生欺綠橘

裴如晦近有贈

吳興才士與黃柑黃柑如日

勝崖蜜帶葉初擎翠竹籃還料楚王曾未識徒將萍實

詫江南

和普公賦東園十題

擷芳亭

結宇東園中種花待春風口歌金縷衣手折枝上紅今

日映綠髮他年羞青銅

清心堂

寂寞外物亂境清心亦清彼皆居深谷此獨處重城夷
齊食薇蕨千古首陽名

石筍

削出青山根峭立碧玉圭不作湘竹老不染帝子啼不
為盤中蔬豈與烟茁齊

待月亭

明月過三五飛出滄海遲佳人望清夜隔樹光離離不
須磔蝦蟇寒魄自有虧

虛白堂

空堂絕纖塵虛靜自生白長風吹月東牕戶如不隔漆
園茲趣深赤水珠難索

假山

太山不可歷石齒齧人足聊集怪與奇蒼蒼都在目何
須引寒流平地作溪谷

書齋

聖賢有事業皆在經籍中已愛牙作籤可輕山賜銅還
來讀詩禮不用辨魚蟲

小池

小池依小山山晴翠光入無容羣蛙鳴間有孤鶴立曾
不起波瀾石郵風自急

紫竹

西南產修竹色異東筠綠栽簫映檀唇引枝宜鳳宿移

從幾千里不改生幽谷


山茶

紅蔕勝朱槿越丹看更大臘月冒寒開
楚梅猶不奈曾非中土有流落思江外

宛陵集卷十六

謹案卷十五第十四頁後八行紗巾時任酒沾濡

按宋元詩會紗作角



總校官庶吉士 臣張能照
校對官助教 臣吳省蘭
謄錄監生 臣陳 黎

欽定四庫全書薈要

集部

宛陵集卷十

七至
九

詳校官助教臣常循



欽定四庫全書薈要卷一萬四千四百五十七

集部

宛陵集卷十七

宋 梅堯臣 撰

除夜雪

擊鼓人驅鬼漫天雪送寒臘從今日盡花作舊年看著
樹多還墮隨風積更乾明朝預王會畏濕兩梁冠

和吳沖卿元會

千官車馬閭闔來晝漏始上閭闔開峨峨左右升龍進

昨夜雪飛雲作堆殿前冠劍魚鱗立東風入仗旗脚迴
黃鍾一奏寶扇掩玳簾捲起香霧排鳴梢未盡霹靂響
翠輦已退黃金階聖人端冕御法座大樂旅作聲和諧
羣公抃蹈丹墀下尚書奏瑞四夷懷乘輿却入更衣閣
通天絳袍陞玉榻百拜稱觴萬歲聞兩廊賜食簪裾匝
典傳太定舞綴疎波旋烟斂飭宮車衛官解嚴多士退
日光亭午氣象舒吳君才華天下傑歸來作詩傳石渠
石渠秘邃無凡愚石渠酬唱皆嚴徐我慙短學復在後

收餘掇棄聊以書

元日

頻年無入閣今日預朝元
丹陛發金奏侍臣稱玉樽
旗旌搖細仗雲霧啓千門
却出蒼龍闕衣冠萬馬屯

依韻和仲源暮冬見寄

曾未學黃庭衰顏已可驚
詩能如阮籍評不愧鍾嶸
玉軫調初美冰壺想更清
兔園風雪甚還聽雁來聲

送韓子文寺丞通判瀛州

嘗聞河間守介直天下無選才才且殊鐵網收珊瑚珊瑚得亦難鐵網取亦劬况茲戎馬郊為貳維多謨新春度潯沲冰上少馳驅

十七日和原甫風花偶書

用其韻

風花不戀枝脫萼亂翻飛自學空中雪寧同垣上衣繞庭回旋久無著衆鳥爭銜何處歸

貽妄怒

飲食無遠近所美貴甘輒南方食蝦蟇密捕向清畎齒

咀口且諱聞語輒忿喘此物何醜惡猶勝螺螄蜺西蜀
亦取之水田名穀犬彼士不為慙吳人休獨恤豈須若
中州牛羊烹大臠

十六日會靈火

章聖皇帝興三宮三宮鼎峙何崇崇天聖七年六月尾
玉清始災壇宇空于今二十有五載上元後夜星軫中
乃聞會靈五殿火丹焰徹天明月紅千楹萬棟一夕盡
赤烟奔突西南風先時二日車駕幸為民祈福輸清衷

大臣驕蹇不從祀岳靈不歆為不恭若此示變猶影響
宜鑒陛下無情容神非怒乙遂及甲天意警聖不警凶
不獨洪水累堯德堯仁未及流驩共

送潘司封知解州

其父嘗
守此州

鹽池暗湧蚩尤血紅波爛爛陽烏熱岸旁遺老記南風
五月滿畦吹作雪白徑嶺上橐駝鳴太行山中騏驎茶
古人射利今人同行商不困何由設朱轡太守自東來
先世大夫留故轍是非取與應不移秦人休銜張儀舌

飲酒呈鄰幾原甫

天地不爭行日月不爭明晝夜自顯晦冬春自枯榮夸
父逐日死共工觸天傾二子不量力空有千古名寄語
賢與愚何嘗見長生我願會良友醉顏日常頽東海為
酒樽五湖為杯羹海罄湖且竭盡倒為解酲苟死不復
知苟生徒牽情項籍乘牛車馳上廣武城強梁取秦鹿
慷慨猶為輕歸來卧酒家豈得慙公卿樂亦但如此舉
世任營營

寄渭州經畧王龍圖

西城橐駝來賀蘭入貢美玉天可汗蕭關夜開月團團
彈筆古峽鳴哀湍前將軍不擐甲取大官今將軍能撫
士尚盤桓河西五郡兵氣完駿馬躍棧無箭瘢我嗟乘
劣不受鞍焉得乞與都人看

二十一日雪中赴宿懷鄰幾原甫

正月東都雪多於舊臘時酒賓臨迥閣野雀集枯枝馬
向西城度花從上苑遲劉郎與江叟相對定爭碁

送永興通判薛虞部

灰宮盜玉秦樓空南山不老天無窮
薛碑剝爛少文字雨耕拾寶牛蹄中
其旁築城聚貔虎黃土爰業如削銅
西州吏人氣吐虹摧鱗斂角聽相公
少年別乘勤爾躬幙府甚盛瓊瑤叢

送宣州簽判馬屯田兼寄知州邵司勳

寒溪翠拖碧玉帶蒼山晴卧蛻骨龍
水邊苦竹抽肥筍石上老蕨拳紫茸
泊船繫纜宿明鏡昭亭廟古攢瘦松

陰風雨電潭心起雲遮北嶺如墨濃田秧浸綠白鷺立
內史出喜嘉賓從昔時謝公來賽神蘭肴作椒金作鍾
聯詩姓何名已失板蠹粉落蟲鳥蹤我鄉復傳召南化
磨鏤黑石君亦逢

觀拽龍舟懷裴宋韓李

截春流築沙坻拽龍舟過天池尾矯矯角岐岐千夫推
萬鱗隨驚鴻鵠沉魚龜春三月輕服時薄水殿習水嬉
馬特特來者誰魏公子人不窺車麟麟集其涯邯鄲倡

士交馳銀瓶索酒傾玻璃用錢如水贈舞兒却入上苑
看鬪雞擊毬彈金無不為適聞天子降玉輦當門虎脚
看大旗春風吹花入行輶紅錦百尺爭蛟螭雲蓋迴綵
纜維明年結客觀未遲

二月四日雪

前日春風初擺條昨夜雪飛深一尺北帝及臘不行令
東皇發煦遭爾厄侵時奪氣四時錯歡問上天何不責
天高地厚語難通俛首下土徒叩額或言莫信難可聞

鶴鳴至微猶不隔休問天問顏蹠休看花看龍麥

荅劉原甫

生平多交友常恨會遇稀每念相笑語昨是今或非重
惜向時遊出處若乖違從今倘有酒莫問梨栗微前夕
呼我飲遣奴來扣扉暗犯風雪往醉脫冠服歸夜來新
霽月清吐萬里輝劉郎戴幅巾江叟披褐衣相過無百
步誰虞竊訶譏三家若循環但知具甘肥

聞語十方璉長老

舊居廬嶽寺新化給孤園還享國人供應無塵事喧有
來聽喻筏一悟見吹幡不憶爐峰下臨溪看飲猿

十一日垂拱殿起居聞南捷

二月雪飛雞狗狂錦衣走馬回大梁入奏邕州破蠻賊
絳袍玉座開明堂腰佩金魚服金帶榻前拜跪稱聖皇
一朝嚴氣變和氣初令漏泄飛四方將軍曰青才且武
先斬逗撓兵後強從來儒帥空賣舌未到已愁茅葉黃
徘徊嶺下自稱疾詔書切責仍勉當因人成功喜受賞

親戚便擬封侯王昔日苦病今不病銅鼓棄擲無鏢鎗
十五日雪三首

寒令奪春令六花侵百花塘冰膠燕觜野水澀芹牙擁
柱輕於絮吹墜淨若沙乳禽饑啄木誰誤撥琵琶

新雷奮地甲密雪鬪鵝毛正欲裁輕縠重令著敝袍沙
泉流復凍烟萼坼還韜只待隣醅熟微聲聽酒槽

春風九十日一半已消磨準擬看花少依稀詠雪多官
車猶載炭范鵲不離窠向此興都盡戴家誰復過

聞密賜

朝聞政府賀捷回夕賜明月五千枚
巍巍聖皇德所該
廟略付與何有哉
况未覆穴翦渠魁
宜先戰士老與孩
傾肝瀝膽謝不敏
豈可便恃張良才

送衛真宰晏寺丞罷長安

捨琴辭苦縣解劔入函關
鵲報遠人至馬衝春雨還
荒榛郊北園葱翠國南山
歸見蕭何政條令舊鎬間

江鄰幾饌鮓

泥鰓魚之下曾不享嘉賓又嫌太健滑治洗煩庖人煎
炙亦苦腥未嘗輒向脣江侯昔南官家膳無此珍昨日
邀我餐下筯勝紫鱗乃知至賤品唯在調甘辛

淘渠

開春溝畎春泥五步掘一塹當塗如壞堤車無行轍馬
無蹊遮截門戶雞犬迷屈曲措足高復低芒鞋苔滑雨
淒淒老翁夜行無子攜眼昏失脚非有擠明日尋者爾
瘦妻手提幼女哭嘶嘶金吾司街務欲齊不管人死獸

顛啼

蓬生麻中

麻畦無曲本蓬質有樛莖所託修仍直安能縱復橫擇
鄰聞舊母益友記諸生蕭艾從茲遠蒿萊不可并何嗟
蔣詡逕孰念衛人行儻匪緣其地秋風廣漠驚

賣鹿角魚

水中龍角而足海小魚角蠢蠢不擬龍乃擬鹿譬彼蝸
抗爾犢漬以鹹鹵久且醖特賣都市叅鼎餽此人何苦

厭猪羊甘爾臭味不飽腹

夜與原甫江家步歸

二十三日

丹砂漆盤盛井水冷浸半坼山櫻花始見春色不奈喜
黃昏招飲夜還家劉郎居南我居北陌上泥開天正黑
風吹蠟燭燒未明素絲作履惜不得

高陽關射亭

星弧射狼夜夜張角弓備寇不可忘將軍屯師古關下
不尚武力何由強日與官兵來會此弓須射硬箭射長

清明曉赴韓侯家自買白杏丁香花雀眼塗金銀篋籠
貯在當筵呼舞娃舞娃取捧笑向客不顧挿壞新烏紗
朝來我舍報生子賀勸大白浮紅霞酒狂有持梧桐板
暴謔一似鄱陽槎袒裼擊鼓禰處士當時偶脫猛虎牙
褊衷不容又何益鸚鵡洲上空蕪葭

送下第親舊

花開風雨惡坐見紛紛落明日結子時又復有脫萼莫
嗟樹漸老樹老子亦著共愛西枝繁不數東枝弱他年

會有春却看西枝薄

鷺

一避吳宮火千年楚屋春
翅迎風雨健聲入戶庭頻掠
水過長渚銜蟲落覆塵休將漢皇后故故比輕身

雨

春雲易成雨一日幾迴陰
燕濕飛猶快花寒色更深
邀車愁客遠盤馬畏泥侵
向晚晴光吐西窻綠影臨

晴

風掃天如鑑，雲開日似萍。
苑花猶帶濕，蔬甲已微青。
蝶翅粉應薄，塘漣波更渟。
尋春不惜醉，莫笑髮星星。

送胡公疎之金陵

綠蒲作帆一百尺，波浪疾飛輕鳥翮。
瓜步山傍夜泊人，石頭城邊舊游客。
月如冰輪出海來，江波千里無物隔。
自古有恨洗不盡，于今萬事何由白。
依稀可記鮑家詩，寂寞休尋江令宅。
楊花正飛鮪魚多，食膾舉酒謝河伯。
但令甘肥日飽腹，誰用麒麟刻青石。
去舸已快風亦便。

寧同步兵哭車輓

送裴虞部知信州

攢青歷歷正面山
刺史日坐雲屏間
楚人竟握水精璞
漢女買作月珮環
時惟產寶不重穀
願當化俗無棄管
往辭丞相相有言
物景清絕何由攀

送李推官之岳州

崑崙燕子五兩竿
霧露薄水平湖寒
風帆美滿八百里
夕從岳陽樓上看
魚跳鷺立月鉤下
星斗爛爛垂欄干

羽書不到樽俎裏蠻兵況去荆楚安試尋燕公舊賦筆
磨圭刻碧獨可完

和和之南齋畫壁歌

終南下臨長安城峻欄高檻黃金羸嵩山亦近洛陽陌
鮮車怒馬一日程大梁平廣匝千里不見雲峰來眼底
其間自有高趣人掃室呼工嵒壑啓初疑巨靈勇擘華
不比將軍能聚米暗雨輕烟滿室中塵事如脂一朝洗
又將餘力作脩竹石上數莖風撼玉葉斜枝亞寒聲盡

節老根穉生意足何須踐苔眠綠陰然後始為嵇阮吟
三賢歌詠已見意舞女不看頻整簪

嫗婦

黃金一丸入雲端羣貧望逐滿長安衆人為貴嫗不惜
棄擲如泥恣彈射藏身葉底有能鳴辜負春風拖雨翻
不飛上天訴至尊幾人辛勤揀砂石

送端式歸漳州

來居天王都常夢苦竹溪乃識高僧趣不為利物迷海

燕乘華屋區區竟銜泥安知矯翼鷗豈類斷尾雞性同
而質殊何必莊指齊

送黃殿丞通判潤州

前年江州飛火龍樓殿化盡山將鎔今聞榱棟復華壯
大閣渠渠出波上南徐別乘簡且間下馬岸傍呼畫舫
永日江風不畏人檝師猱獍欺白浪衣上京塵莫厭多
抖擻中流雲在望

棟花

紫絲暈粉綴薜花綠蘿布葉攢飛霞鶯舌未調香萼醉
柔風細吹銅梗斜金鞍結束果下馬低枝不碍無闌遮
長陵小市見阿姊濃熏馥郁升鈿車莫輕貧賤出閭巷
迎入漢宮人自誇

次韻和端式見贈

不為阮步兵發詠怨朝陽不學屈大夫行吟思騷芳其
雨豈無時細珮空自香吾道不苟合我懷固有常江南
一畝宅近在句溪旁仕宦且如此夢寐安敢忘以子論

言多重歌木桃章

楊公蘊之華亭宰

月徑千里大中有神城宮宮旁種玉桂柯葉垂瓏瓏蝦
蟇穴其根出輒氣墨蒙光魄縱復吐血赤如頑銅不知
從何時更使人蹤通年年折桂枝寬少尚易充今年拘
都盡秃株立童童株秃莫爾攀墮雲雙手空歸來走海
上買鶴問吳翁

端午前保之太傅遺水墨扇及酒

畫扇雙酒壺置前兵吏立言將國匠奇重以風義執樹
石冰上看山河月中入便持菖蒲飲不畏青蠅及

送汝陰宰孫寺丞

編郎唱觴燕尾下潁水落日虵鱗生綠蒲被岸漁網舉
黃鳥啄甚縹車鳴吏無詬租官正來不惜魴鱖與吏烹
饋吏人情見里黨官非喜慢知官清

和曇穎師四明十題

雪竇山

重雲不藏春深竇常有雪曉月號松猿晴壁挂海霓終
恍無心人區區佩環玦

龍隱潭

老龍戀潭窟不雨亦不雲吐涎出溪滑吹腥隔林聞疾
雷驅未去魚鼈競紛紛

含珠林

山為驪龍蟠谷作驪龍顙珠樹存其間誰採明月來何
須循海隅笑蚌未成胎

偃蓋亭

既將茅覆簷復有松為蓋五里入山時憇此得寒籟曾
無康樂游但見雲衲會

雲外菴

山僧好寂靜入雲恨不深峰間一雨昏林表孤燈沉往
來有猿狖呼嘯自成音

石筍峰

巨石如龍孫聳聳烟霧裏明明落落溪口納納喧灘齒何

當助齋孟菌蕃徒為美

宴坐巖

智覺禪師
於此不睡

心危身亦危衽席尚顛墜如何崑石上來坐自安意能
喻死生間無論寤與寐

三層瀑

山頭出飛瀑落落鳴寒玉再落至山腰三落至山足欲
引煮春山僧房架剝竹

丹山洞

山無鳳凰飛洞有仙人跡蝙蝠大如鴉莓苔偏上屐自
慙無道骨安問緣雲客

獅子巖

崑形若狻猊不能千里走豈無鳥獸羣當假風雷吼寄
謝棲息人想像真妄有

宛陵集卷十七

欽定四庫全書薈要卷一萬四千四百五十八

集部

宛陵集卷十八

宋 梅堯臣 撰

依韻和原甫省中松石畫壁

富彥國為省判
日令許道寧畫

山林與城闕事物不相對
唯聞秉道義所處無內外
趨煩而毀靜此理乃俗輩
昔有天下賢喜得名筆會買粉
塗南牆松石生屋內石怪如春濤
松偃如起籟畫來二十年數偶未
輒愛罕親憑桼顏但覩抱犢背
雖當省闥

嚴晦昧欲何賴今逢茂陵人獨唱亦豪邁

依韻和原甫廳壁許道寧山水云是富彥國作判
官時畫

山情水思半軒間試問來居有底間唯有才高方暇佚
無論歲月自能攀

依韻和劉原甫見寄

憶昔游臨汝于時太守賢山尋順風處城得秦龍遷民
頸纍纍大池荷一一圓周碑嗟缺矣少室望嶄然羸馬

居人後歸禽落我先事還如響荅老去若波旋賦分都
應定元功豈得偏不須天以問自可鑒於前王粲今方
樂邊韶舊好眠漢宮聊擲彩梵學競通禪語道滔滔是
論情往往牽平生二三友南睇不勝情

醉和范景仁賦子華東軒樹次其韻

五月十日

樹影落東墻影微人已醉休看枝上綠但對眉間翠

五月十四日與子華自內中歸

君注起居同左史我為委吏退延和共經南陌東風急

側帽偷看意已多

送傅越石都官歸越州待闕

越客舟從真定至
夜夜鏡湖生夢寐
曉度吳江百尺船
洗眼重看會稽翠
買臣負薪樵徑荒
伯鸞賃舂苔白棄
綠橘黃柑帶葉收
白粳紫蟹侵霜飫
食蟹易美粳易飽
綠橘佐酒柑佐醉
莫論仕官遠與近
布被練袍何所利
君恬不忍乞丐為
且返故廬聊以遲

吳沖卿出古飲鼎

精銅作鼎土不蝕地下千年蘚花幕腹空鳳卵留藻文
足立三刀刃微直左耳可執口可斟其上兩柱何對植
從誰發掘歸吳侯來助雅飲歡莫極又荷君家主母賢
翠羽胡琴令奏側絲聲不斷玉箏繁繞樹黃鸝鳴不得
我雖衰茶為之醉玩古樂今人未識

二十四日江鄰幾邀觀三館書畫錄其所見

五月秘府始暴書一日江君來約予世間難有古畫筆
可往共觀臨石渠我時跨馬冒熱去開厨發匣鳴鑰魚

義獻墨跡十一卷米玉作軸光疏疏最奇小楷樂毅論
永和題尾付官奴又看四本絕品畫戴嵩吳牛望青蕪
李成寒林樹半枯黃荃工妙白兔圖不知名姓貌人物
二公對奕旁觀俱黃金錯鏤為投壺粉障復畫一病夫
後有女子執巾裾牀前紅毯平圍爐牀上二姝展艷能
繞牀屏風山有無畫中見畫三重鋪此幅巧甚意思殊
孰真孰假丹青模世事若此還可吁

奉和吳沖卿秘閣觀逸少墨蹟韻

奇哉王右軍下筆若神聖長戈與伏弩無不從號令賢
豪雖林立帖斂孰敢競師徒氣揚揚龍虎旗正正勝聲
塞宇宙自昔無此盛赫赫猶至今瑰瓚曷云並崇崇中
秘書濟濟士游泳墨寶收盈厨來觀遇已橫始知前人
蹟鑄多自失勁紙素儻未壞萬古傳莫竟一從歸人間
夢寐不能更但媿將短才輒爾接高詠何羞趙壹窮自
有鍾嶸評嘗聞曹將軍尚請賦競病我生羣俊末貧賤
亦足慶文成終愧君鉛刀值枯梗

同江鄰幾龔輔之陳和叔登吹臺有感

在昔梁惠王築臺聚歌吹笙簫無復聞黃土化珠翠當時秦兵強今亦歸厚地我與諸賢良舉酒莫言醉曾誰問孟軻空自有仁義

逢羊

并序

予晨過北郭見羣羊有羝處前其首叩然而偉腴其角拱然而聳其毛茸然而長自膊至腕駸駸與纓胡相若其羣狼逐而擁趨如奉馬及其宰也羝存而羣死之予

歸作詩示諸友云

牧人垂長髯驅羊從北道老羝壓大羣毛比長髯好暮
歸同一欄朝出不擇草既肥當用烹從羝羝獨保狡誘
以全軀角尾徒為老

依韻和張中樂寺丞見贈

朝車走轉轉暮車走轉轉黃埃蔽車輪赤日爍車屋靡
論遠與近安問疎與熟賢愚各有求往返相磨礱我馬
不出門我蹟亦以跼心慕中樂賢道義聞且宿其言

清而新其貌古不俗書可到二王辯可折五鹿往見未
為勞定交然後篤惠詩何勁敏對敵射銅鏃穿楊有舊
手驚雀無全目強酬非所當宜將弓矢速

依韻和原甫對月見邀不至

每愛孔北海罇中常不空今無酒與客唯有月兼風遠
色曾何隔微涼亦已同更期三五夕靜坐接談叢

依韻和原甫月夜獨酌

月下馬蹄休擾擾夜涼蟲響競囀囀一杯獨飲愁何有

孤榻無人膝自搖
北斗柄高天漸轉
小冠簪冷髮微凋
誰知靜對頽然影
竟夕幽懷豈易聊

依韻和原甫早赴紫宸朝待旦假寐

月落西樓露氣寒
大明將謁望清班
燭房猶照衣冠上
漏舍欲為魚鳥間
入仗采旗開日月
在庭公衮儼雲山
我慙一似朝宗水
亦得隨流到海還

依韻和原甫新置盆池種蓮花菖蒲養小魚數十
頭之什

瓦盆貯斗斛何必問尺尋
菖蒲未見花蓮子未見心
小鮮不足烹安用芎餌沉
戶庭雖云窄江海趣已深
襲香而玩芳嘉賓會如林
寧思千里游鳴櫓上清潯

送施屯田提點銅場兼相度嶺外鹽入虔吉

江西采銅山未竭南越熬波海將結
主人貪利不畏刑白日持兵逾盜竊
銅私鑄器鹽奪商死共吏爭蛇鬪穴
姦豪乘勢倚蠻陬劫掠聚徒成蟻蛭
今雖驅翦嶺下平尚恐根存更生蘖
因擇健才通便民付職與權將有設

秋香亭上共為賓却作主人殊少悅徂東走北十五年
只有山川看不別

依韻和江鄰幾癸巳六月十日同刁吳韓楊飲范
景仁家晚赴館宿覩吳興太守章伯鎮題壁記辛
卯仲秋初吉九月十一日十月二十二日十二月
十一日壬辰二月一日館直慨然有感

江翁多感槩飲散來直廬題蹤有舊友連蹇常與渠昨
歸天祿下念昔悲有餘未久復外補安能戀清虛得請

向苔雪幽懷寄禽魚高城浸湖光面面當紅蕖晚乘畫
舫遊四坐羅輕裾數杯已酩酊萬事應破除不愛趨時
近不恤與世疎百歲且過半冉冉將焉如誰慕八十叟
猶在磻溪漁嗟哉再宿夕乃自仲秋初清談固隔絕可
見壁上書

送林大年寺丞宰蒙城先歸餘杭

逋之姪孫

東方有奇士隱德珠在淵川壑為之媚草樹為之妍歿
來十五載獨見諸孫賢煌煌出仕塗皎皎如淮蠙今為

蒙城宰歸問浙江船何時度揚子夜入明月邊有鳥不
化鳬有琴何用絃真趣還自得治民唯力田

依韻和原甫六月八日曉雨

侵曉忽飛雨颯然戶庭涼滴階初聞聲濯樹暗有香吹
燭焰閃閃鳴雞濕昂昂稍已便衣冠喜氣眉宇翔安然
如涸魚响沫久已望塵纓自可潔何必念滄浪

送余中舍知漢州德陽

匹馬易為秣單車長是輕秋風來棧道宿雨度關城石

上樹林暗山根江水明
桐花鳳何似歸日為將行

勉裴如晦

裴侯失嬰兒心腸如焚煎
愛玩白玉玦墜地不復全收
拾見顏色瑩徹猶自妍
鳳皇生九雛一卵破易捐
況多令男子拭淚慰目前

送謝寺丞知餘姚

其姪師厚嘗宰此邑

姚江千里海汐應山井亦與江潮通
秋來魚蟹不知數日日舉案將無窮
高堂有親甘可養下舍有弟樂可同

縣民舊喜諸郎政，努力莫媿今為翁。

與蔣秘別二十六年，田隸二十年，羅拯十年，始見之。

我今五十二，常苦離別煎。屈指數離別，正去一半年。三君異出處，相見有後先。蔣最會遇早，羅倍晚於田。仕宦比我遲，官資居我前。此亦漫輕量，無限歸荒延。所喜笑語同，各驚顏貌遷。髮有霜華侵，目有蜘蛛懸。有酒易以醉，有奚徒用妍。醒來念功名，病螾希蜿蜒。安得有園廬。

寬閒近林泉養魚數千頭種薤三四廛餘蔬皆稱此嘉
果植亦然既無俗造請窮冬事高眠困貯白粳稻酒沽
青銅錢飯過引數杯令兒誦嘉篇仰首看赤日區區隨
天旋朝見出滄海暮見入虞淵畢竟將何窮磨滅愚與
賢億億萬萬載筋骨非玉堅桐棺三寸厚在昔誰免焉
去去欲及時嗟嗟無由緣

別三十弟彥臣

二十
八日

朝辭都城裏暮止汴堤頭滿目非相親寂默對河流

依韻和雪竇山曇穎長老見寄

處山無獸山林鳥正關關月入潭心白花明谷口閒采
薪能自至流水不知還聞欲觀滄海高峰峻亦攀

送余中舍監韶州錢監

孤青水中石片白蒼梧雲虞舜不可見簫韶不可聞君
為漢錢官鑿山取銅鑛韶石不生銅留為千古景

七夕詠懷

織女無恥羞年年嫁牽牛牽牛苦娶婦娶婦不解留來

往一夕光奕奕河漢秋輕傳人世巧未知何時休喜鵲
頭無毛截雲駕車輶老鴉少斟酌死欲同造舟明月不
到曉是夜曲如鉤天意與物理注錯將何求嘗聞阮家
兒犢鼻竹竿頭人生自有分豈媿曝衣樓

送弟禹臣

王都寓居樹陰少惟有墻隅兩株棗去年相見棗花開
今年相別棗實好棗實未剥風莫吹我鬢愁多似蓬葆
淮南到時何所逢秋葉蕭蕭蟹應老憶昔共歸江上初

對飲蘆洲月如縞半夜魚跳鏡破光萬事觸然何足道
自此重經二十秋不改青青岸旁草

送叔昭上人附施屯田歸宣城

瓶中過江去遠託故人船借問風濤勢何如杯度年

山茶花樹子贈李廷老

南國有嘉樹華若赤玉杯曾無冬春改常冒霰雪開客
從天目來移比瓊與瑰贈我居大梁蓬門方塵埃舉武
尚有碍何地可以栽每游平棘侯大第夾青槐朱欄植

奇卉磨碧為壅臺於此豈不宜亟致勿徘徊將看榮茂
時莫嗤寒園梅

送吳照鄰都官通判成都

君家婦何賢捨舟具車轂五年夢在梁三年行向蜀迨
遞今日同辛勤昔時獨看花久莫留買錦慰不足歸來
兒女大婚嫁應相續

依韻和原甫昭君辭

武帝常勒兵北登單于臺始欲以威伏竟亦慙懷來徒

令出塞師萬里求龍媒未弭後世患王顏困黃埃丹青
不足恨謀慮少徘徊月如漢宮見心向胡地摧在昔李
少卿聽笳動悲哀壯士尚如此蛾眉安得開情語既不
通豈止腸九回初冬誠難保死不如草萊

再依韻

一嫁異域去不復臨鏡臺念昔辭家時豈為單于來適
遐固亦命配醜非由媒始欲並日月今嗟隨風埃僕侍
共慘戚山川空徘徊鴻雁為之悲肝腸為之摧寧聞琵琶

琵琶但聞琵琶哀休言羊酪甘誰喜氍毹開故國萬餘里此生那得回乃知女子薄莫比原上萊

飲劉原甫舍人家同江鄰幾陳和叔學士觀白鵬孔雀鳬鼎周亞夫印鈿玉寶赫連勃勃龍雀刀

主人鳳皇池二客天祿閣共來東軒飲高論雜談謔南籠養白鵬北籠養孔雀素質水紋纖翠毛金縷薄大誇鳬柄鼎不比龍頭杓玉印傳條侯字辨亞與惡鈿劍刻辟邪符寶殊制作末觀赫連刀龍雀鑄鏤鍰每出一物

玩必勸衆賓酌又令三雲髻行酒何倬約固非世俗驩
自得閱古樂聖賢泯泯去安有不死藥竟知不免此烏
用強檢縛開目即是今轉目已成昨歸時見月上酒醒
見月落恍然如夢寐前語誠不錯

次韻和永叔退朝馬上見寄兼呈子華原甫

公歸初退內朝班馳道南頭躍錦鞍欲雨浮雲猶復暗
背陰殘雪愈生寒穿槐已覺春禽語載酒重思結客驩
吟寄侍臣知有意翠鬟爭唱口應乾

劉涇州以所得李士衡觀察家號蟾蜍硯其下刻
云天寶八年冬端州刺史李元德靈卵石造示劉
原甫原甫方與予飲辨云天寶稱載此稱年偽也
遂作詩予與江鄰幾諸君和之

硯如剗蓋腹如月又若剖瓢萌強發鐫題天寶年造之

刺史李元傳自越剗蓋剖瓢我莫分稱載作年初辨君

君雖能辨猶曰寶

原甫詩云李侯寶硯劉侯得

寶茲偽物吾何云仰

天大笑飲君酒硯真硯偽休開口願封漆匣還與侯請

共江翁獨持守

江詩云劉侯實此處勿忘慎勿將心逐名轉

送劉弼秘校赴婺源

雲木葱蘢處雞鳴古縣城山高地多險源近水偏清
斫漆資商貨栽茶雜賦征案頭龍尾硯切莫苦求精

送閻中孚郎中知磁州

簫管梁王臺風雪邯鄲道君行守趙城我向夷門老持
麾邦寄重歌袴民欣早重岡古獵場驚兔離衰草

次韻和王景彝十四日冒雪晚歸

子猷多興憐飛雪向晚歸時又見飄拂馬隨人如着莫
舞空吹面亦勝消閉門我作袁安睡呵筆君為謝客謠
記取明朝朝謁去毳裘重戴冷寥寥

和王景彝晚逢赴江鄰幾飲

殘雪晚生寒良朋邀我飲逢君三省歸交轡一相審乘
興興未盡既杯杯太甚夜闌踏月迴火冷人已寢

次韻和吳冲卿傷何濟川

生愛虛名苦辯亡淪精竭智可哀傷誰將事附三公傳

自有文誇古戰場墳土未乾還卜穴挽聲纔絕又新章
是非從此方應定弟子猶爭左氏長

次韻景彞赴省宿馬上

烏紗帽底青眸轉朱雀街頭玉轡搖燈火高樓吹短笛
簾櫳斜巷隘初宵身歸蘭省唯看月心在天津欲倚橋
枕上夜深應不寐羨他年少酒微銷

送李獻甫

覽君南來詩如對江上景今忽告我歸東風生馬頸馬

行日幾里到家梅萼逞重登石頭城為我一引領

送周諫議知襄陽

藹藹荊州幾萬家
竟持壺酒望高牙
兒尚唱銅鞮曲
者舊爭隨畫鹿車
雄鴨綠頭看漢水
肥鰯縮項出漁查
鄉人應笑張平子
只有歸田賦可誇

依韻和原甫廳壁錢諫議畫蟹

諫議吳王孫
特畫水物具
至今圖寫名
不減南朝顧
濃淡一以墨
聲殼自有度
意將輕蔡謨
殆被蚶蜊誤



宛陵集卷十八